



IL FURLAN IN SFIDE PE ZORNADE INTERNAZIONÂL DE LENGHE MARI CREE UN MEME ANCJE TU!



In ocasion de **Zornade Internazionâl de Lenghe Mari**, promovude de Unesco e celebrade ogni an ai 21 di Fevrâr, la lenghe furlane e acete la sfide dai Meme, cemût che e veve za fat l'an passât.

E sarà la **ARLeF**, Agenzie Regjonâl pe Lenghe Furlane, tant che partner uficiâl de iniziative, a butâ la sfide invidant ducj i furlans a cjapâle sù e a divertîsi cu la

lenghe furlane sui social, **fin ai 21 di Fevrâr dal 2018**.

La "Mother Language Meme Challenge", batiade par furlan tant che la "**Sfide dai Meme te Lenghe Mari**", e je organizade di RisingVoices, Indigenous tweets, Living Tongues, Endangered Languages, First peoples' cultural council, DLDP tant che une iniziative simpatiche che e previôt l'ûs dal social media par promovi e celebrâ su internet la diversitât linguistiche, culturâl e il multilinguism. Si trate duncje di un moment legri ma che al vûl marcâ la impuartance de tutele di dutis lis lenghis e in particolâr di chês nativis, di minorance, di origjin o in vie di estinzion e dai dirits linguistics di cui che lis fevele. La ocasion e je, apont, chê de Zornade de Lenghe Mari che dal 2000 e ven celebrade in ricuart di un episodi tragjic, che al va indaûr ai 21 di Fevrâr dal 1952, cuant che cuatri students bengalês de Universitât di Dacca a son stâts copâts de polizie di chel che alore al jere il Pakistan orientâl, intant che a protestavin pal ricognossiment dal bengali tant che lenghe uficiâl. Insieme al furlan, une vore di altris lenghis a partecipin ae sfide dai meme, tra chestis: l'afrikaans, l'aragonês, l'asturian, l'aymar, il galizian, il bahasa de Indonésie, il nawat, l'ocitan, il portughês e il quechua, il sart.



Partecipâ ae sfide al è facil, baste acedi al sît

<http://www.furmememl.wordpress.com>

e lâ daûr des istruzions. Si pues siezzi *une imagjin e scrivi parsore une frase (ironiche) in lenghe furlane: o varês creât cussì un Meme che, dopo, o varês dome di condividi il plui pussibil sui social network tant che **Facebook, Twitter o Instagram** e cui vuestris amîs, visantsi di doprâ simpri i hashtag **#MemeML e #furlan**.*

Sul profil **facebook** de ARLeF www.facebook.com/AgenzieARLeF/ o cjatais za cualchi **Meme simpatic di condividi** e di **sparnicâ** ma ancje di cjâlâ ben par **vê la juste ispirazion pai vuestris!**

